

REGLUR

um háskólaráð og rektor Landbúnaðarháskóla Íslands.

1. gr.

Gildissvið.

Reglur þessar um háskólaráð og rektor Landbúnaðarháskóla Íslands eru settar af háskólaráði á grundvelli laga um háskóla nr. 63/2006 og laga um opinbera háskóla nr. 85/2008. Þær eru til fyllingar settum lögum sem um skólann gilda.

2. gr.

Háskólaráð.

Háskólaráð fer með æðsta ákvörðunarvald innan háskólans nema mælt sé á annan veg í lögum, markar heildarstefnu í kennslu og rannsóknum, mótar skipulag, fer með almennt eftirlit og ber ábyrgð á að háskólinn starfi til samræmis við gildandi lög og reglur.

Rektor háskólans er formaður háskólaráðs og boðar til funda í ráðinu og stýrir fundum þess, sbr. 7. gr. laga nr. 85/2008.

Auk rektors eiga sæti í háskólaráði til tveggja ára í senn:

- a) Tveir fulltrúar háskólasamfélagsins, tilnefndir af háskólafundi.
- b) Einn fulltrúi nemenda, tilnefndur af Nemendafélagi LbhÍ.
- c) Einn fulltrúi tilnefndur af mennta- og menningarmálaráðherra.
- d) Tveir fulltrúar eru tilnefndir af þeim fulltrúum sem fyrir eru í háskólaráði.

Tilnefna skal varamann fyrir sérhvern fulltrúa í liðum a-c og einn varamann fyrir fulltrúa skv. lið d, með sama hætti, en staðgengill rektors er varamaður hans í háskólaráði og gegnir þá störfum formanns, stýrir og boðar til funda og fer með atkvæði formanns í fjarveru hans.

Þeir sem valdir eru sem fulltrúar háskólasamfélagsins í háskólaráð skulu, þegar tilnefning á sér stað, vera starfsmenn háskólans í fullu starfi, en kjörgengir eru þó ekki rektor, aðstoðarrektorar, deildarforsetar, rekstrarstjóri og kennslustjóri.

Tilnefning fulltrúa háskólasamfélagsins skal tekin á dagskrá háskólafundar skv. útsendu fundarboði. Samtímis því sem fundarboð er sent út a.m.k. þremur vikum fyrir fund skal auglýst eftir framboðum á vef skólans. Í fundarboði til háskólafundar skal jafnframt lýst eftir framboðum. Skulu framboð berast skrifstofu rektors a.m.k. viku fyrir boðaðan fund.

Háskólafundur kýs á milli þeirra sem eru í kjöri til að taka sæti sem fulltrúar háskólasamfélagsins í háskólaráði, en fulltrúar nemenda á háskólafundi hafa þó ekki atkvæðisrétt um það mál.

Nemendafélag LbhÍ annast val á fulltrúa nemenda í háskólaráð og skal rektor f.h. háskólaráðs kalla eftir tilnefningu af þess hálfu a.m.k. þremur vikum áður en kjörtímabil nýrra fulltrúa hefst.

Háskólaráð getur sett frekari reglur um val á fulltrúum háskólasamfélagsins og nemenda í háskólaráð, en skal rektor þá jafnan afla umsagnar háskólafundar og Nemendafélags LbhÍ áður en slíkar reglur eru settar eða þeim breytt.

Um skipan háskólaráðs og um hlutverk þess að öðru leyti fjallar í 5.-6. gr. laga nr. 85/2008 um opinbera háskóla.

Háskólaráð setur reglur um framhaldsnám á meistarastigi og doktorsstigi við háskólann.

Færa skal til bókar og kunngerá með viðeigandi hætti ákvarðanir háskólaráðs.

3. gr.

Rektor.

Rektor er æðsti yfirmaður stjórnslu háskólans og er í fyrirsvari fyrir skólann almennt, sbr. 8. gr. laga nr. 85/2008 um opinbera háskóla.

Rektor stýrir daglegri starfsemi háskólans og hefur frumkvæði að því að háskólaráð marki sér heildarstefnu í málefnum hans. Hann ber ábyrgð á og hefur eftirlit með allri starfsemi, þ.m.t. ráðningar- og fjármálum og annast gerð starfs- og rekstraráætlana.

Rektor ræður akademískt starfsfólk og annað starfsfólk háskólans. Rektor skal ennfremur sjá til þess að til séu starfslýsingar fyrir allt starfsfólk, að svo miklu leyti sem þær koma ekki fram í lögum eða kjarasamningum.

Rektor hefur yfirumsjón með sjóðum skólans og öðrum eignum nema háskólaráð ákveði annað. Um stjórn sjóða fer að öðru leyti eftir fyrirætlum í stofnskrám og samþykktum.

Rektor boðar til funda eftir reglum háskólans og hefur umsjón með útgáfu ársskýrslu.

Staðgengill er rektor til aðstoðar og gegnir starfinu tímabundið í fjarveru eða forföllum hans. Rektor tilnefnir annan hvorn aðstoðarrektora sem staðgengil sinn og tilkynnir háskólaráði. Falli rektor frá eða láti af störfum áður en starfstími er liðinn sinnir staðgengill starfinu þar til nýr rektor hefur verið skipaður samkvæmt lögum og reglum um háskólann.

4. gr.

Skipun rektors.

Mennta- og menningarmálaráðherra skipar rektor til fimm ára samkvæmt tilnefningu háskólaráðs, sbr. 1. mgr. 8. gr. laga nr. 85/2008 um opinbera háskóla.

Við val á rektor skal háskólaráð tilnefna þrjá menn í valnefnd til að meta hæfni umsækjenda og skal einn þeirra tilnefndur sem formaður nefndarinnar.

Valnefndarmenn skulu hafa lokið doktorsprófi úr háskóla eða aflað sér jafngildrar þekkingar og reynslu og hafa auk þess marktæka stjórnunarreynslu á háskólastigi.

Hæfni umsækjenda um embætti rektors skal metin í ljósi heildarmats með tilliti til vísinda- og útgáfustarfa, ferli sem háskólaakennara eða í öðrum störfum, stjórnunarreynslu og með tilliti til þess hversu menntun og reynsla viðkomandi muni nýtast í starfi rektors.

Engum má veita embætti rektors nema meirihluti valnefndar hafi látið í ljós það álit að viðkomandi teljist hæfur til að gegna starfinu.

Ef sitjandi rektor háskólans sækist eftir endurtilnefningu skal hann víkja af fundi háskólaráðs við afgreiðslu málsins.

Háskólaráð skal annast um auglýsingu á lausu starfi rektors og getur ráðið falið sitjandi rektor að annast framkvæmd þar að lútandi.

5. gr.

Gildistaka – endurskoðun.

Reglur þessar, staðfestar af háskólaráði Landbúnaðarháskóla Íslands, öðlast gildi við birtingu í B-deild Stjórnartíðinda.

Háskólaráð endurskoðar reglur þessar eftir þörfum og sæta þær breytingum af hálfu þess með venjulegum hætti, en þó að teknu tilliti til áskilnaðar laga og stjórnvaldsfyrirmæla.

Ákvæði til bráðabirgða.

Fulltrúar háskólasamfélagsins í háskólaráði skv. a-lið 3. mgr. 2. gr. eru þeir sem kosnir voru á háskólafundi sem fram fór 11. október 2013 út tilnefningartímabil sitt eða þar til annað verður ákveðið á háskólafundi.

Landbúnaðarháskóla Íslands, 31. október 2014.

Björn Þorsteinsson rektor.